

Inzko: Upravo sada je vrijeme za suradnju i okretanje ka budućnosti

Nakon jučerašnjeg napada na premijera Srbije Aleksandra Vučića u Potočarima, gdje se održavala komemoracija povodom 20. godišnjice genocida u Srebrenici, visoki predstavnik međunarodne zajednice u BiH Valentin Inzko dao je sljedeću izjavu:

„Najoštrije osuđujem napad na premijera Vučića, koji se desio jučer u Potočarima, na dan kada odajemo počast ne samo žrtvama u Srebrenici, nego i svim nevinim žrtvama u BiH i cijeloj regiji.

Očekujem da će nadležni organi obaviti žurnu istragu, te da će počinitelji biti procesuirani u skladu sa zakonom.

Budućnost je u nastavku procesa koji vode ka pomirenju, toleranciji, međusobnom uvažanju i općem napretku. Podržavam sve one koji svojim izjavama jasno pokazuju opredijeljenost da se mržnji kaže ‘ne’, a tu prije svega mislim na premijera Vučića, koji je pružio ruku Bošnjacima, na majke Srebrenice, načelnika Durakovića, kao i na Predsjedništvo Bosne i Hercegovine.

Sada je trenutak, kao nikada ranije, da se intenziviraju odnosi i suradnja – prvenstveno između Sarajeva i Beograda, unutar BiH, ali i u cijeloj regiji. Potrebno je da se svi okrenemo ka budućnosti, kako bi ona bila bolja, posebno za mlade generacije. Međunarodna zajednica, kao i ogromna većina građana u BiH i regiji, neće odustati od ovog cilja.“